

**სსიპ – შოთა რუსთაველის საქართველოს ეროვნული სამეცნიერო ფონდისა და ფრანგულ-ქართული უნივერსიტეტის ერთობლივი სამეცნიერო კვლევითი სტაჟირების საგრანტო კონკურსის პირობები**

**1. ზოგადი დებულებანი**

1. სსიპ – შოთა რუსთაველის საქართველოს ეროვნული სამეცნიერო ფონდისა (შემდგომ – ფონდი) და ფრანგულ-ქართული უნივერსიტეტის (შემდგომ – უნივერსიტეტი) ერთობლივი სამეცნიერო კვლევითი სტაჟირების საგრანტო კონკურსის (შემდგომ – კონკურსი) დებულება და პროექტის შეფასების კრიტერიუმები (შემდგომ – დებულება) აწესრიგებს კონკურსის გამართვის, შეფასების, გრანტის გაცემისა და პროექტების განხორციელების მონიტორინგის წესს.
2. კონკურსის მიზანია გააღრმავოს საუნივერსიტეტო და სამეცნიერო თანამშრომლობა საქართველოსა და საფრანგეთს შორის და სამეცნიერო კვლევითი სტაჟირების გავლის გზით ხელი შეუწყოს საერთაშორისო სამეცნიერო-კვლევით პროექტებში მხარეთა ერთობლივ ჩართულობასა და საქართველოს უმაღლესი საგანმანათლებლო დაწესებულებების დოქტორანტების კარიერულ განვითარებას.
3. კონკურსის ფარგლებში დაფინანსების მოპოვება შესაძლებელია ყველა სამეცნიერო მიმართულებაში.

**მუხლი 2. კონკურსის მონაწილე სუბიექტები და მონაწილეობის პირობები**

1. კონკურსში მონაწილეობის უფლება და საგრანტო დაფინანსების მოპოვება შეუძლია მიწვეულ მკვლევარს.
2. მიწვეული მკვლევარი - საქართველოს მოქალაქე, რომელიც არის საქართველოს უმაღლესი საგანმანათლებლო დაწესებულებების დოქტორანტურის საფეხურის სტუდენტი - დოქტორანტი.
3. კონკურსში მონაწილეობის აუცილებელი პირობაა მიწვეულ მკვლევარს ჰყავდეს:
  - 3.1 მასპინძელი დაწესებულება – საფრანგეთის უნივერსიტეტები და კვლევითი ინსტიტუციები, რომელთა ბაზაზე მიწვეული მკვლევრები განახორციელებენ კვლევით და აკადემიურ საქმიანობას.
  - 3.2 მენტორი – მასპინძელი დაწესებულების მიერ შერჩეული პირი, რომელიც ხელს უწყობს მიწვეულ მკვლევარს მასპინძელ დაწესებულებაში კვლევის განხორციელებაში.
4. პროექტით გათვალისწინებული კვლევითი ვიზიტის ხანგრძლივობა უნდა შეადგენდეს 2 თვეს.
5. ფონდი და უნივერსიტეტი ერთობლივად შეარჩევენ და მხარს დაუჭერენ დოქტორანტურის საფეხურზე სამი მიწვეული მკვლევრის სამეცნიერო ვიზიტს საფრანგეთში.

### მუხლი 3. კონკურსის ბიუჯეტი

1. კონკურსში გამარჯვებულების დაფინანსებას უზრუნველყოფენ ფონდი და უნივერსიტეტი ერთობლივად.
2. ერთი გრანტის მიმღები მიწვეული მკვლევრის სტიპენდია შეადგენს 2,100 (ორი ათას ასი) ევროს ეკვივალენტს ლარში.
3. ფონდის მხრიდან დაფინანსების წილი ერთ გრანტის მიმღებ მიწვეულ მკვლევარზე შეადგენს 1,050 (ათას ორმოცდაათი) ევროს ეკვივალენტს ლარში.
4. ფონდი და უნივერსიტეტი თანაბრად დააფინანსებს გრანტის მიმღები მიწვეული მკვლევრის სტაჟირებას. სტიპენდია ფარავს საცხოვრებლის, ავიაბილეთის (ორი მიმართულების) და სხვა კვლევასთან დაკავშირებულ ხარჯებს.

### მუხლი 4. კონკურსზე რეგისტრაციის წესი და საკონკურსო დოკუმენტაცია

1. საგრანტო კონკურსში პროექტის რეგისტრაცია ხორციელდება ორ ეტაპად:
  - ა) რეგისტრაცია ფონდის გრანტების მართვის ერთიან სისტემაში - GMUS [Grants Management Unified System] – 2026 წლის 27 აპრილიდან - 2026 წლის 22 მაისის 16:00 საათამდე;
  - ბ) რეგისტრაცია ფონდის კანცელარიაში - „განცხადება კონკურსში მონაწილეობის შესახებ“ წარმოდგენით (გენერირდება კონკურსის ელექტრონული ბაზიდან) – 2026 წლის 2 ივნისის 17:00 საათამდე.
2. საგრანტო კონკურსში მონაწილეობისათვის მიწვეულმა მკვლევარმა გრანტების მართვის ერთიან სისტემაში GMUS-ში [Grants Management Unified System] ელექტრონულად უნდა დაარეგისტრიროს პროექტი, რომელიც შედგება შემდეგი ქართული და ინგლისურენოვანი დოკუმენტებისაგან (PDF ფორმატში):
  - ა) კრებსითი ინფორმაცია (ივსება GMUS-ში);
  - ბ) საპროექტო წინადადება;
  - გ) პროფესიული ბიოგრაფია (CV) – კონკურსანტი უნდა დარეგისტრირდეს GMUS-ში, შექმნას „მეცნიერის პროფილი“, რომლიდანაც დაგენერირდება CV, ექსპორტირდება და აიტვირთება PDF დოკუმენტის სახით პროექტის წარდგენისას;
  - დ) ინგლისური ენის ან ფრანგული ენის ცოდნის დამადასტურებელი ოფიციალური დოკუმენტი (სერტიფიკატი, ან დოკუმენტი ენის მინიმუმ B2 დონეზე ცოდნის მითითებით);
  - ე) მოწვევის წერილი - წერილი მასპინძელი დაწესებულებისგან (საფრანგეთის უნივერსიტეტები და კვლევითი ინსტიტუციები), ხელმოწერილი უფლებამოსილი პირის მიერ ორგანიზაციის ოფიციალურ ბლანკზე (კვლევითი ვიზიტის დაწყების თარიღისა და ხანგრძლივობის მითითებით). წერილის ქართული თარგმანი დამოწმებული უნდა იყოს თარჯიმნის ან/და თარჯიმანთა ბიუროს ბეჭდით;

ვ) მენტორის თანხმობის წერილი - წერილს თან უნდა ერთვოდეს გაცემის თარიღი და მენტორის ხელმოწერა; წერილის ქართული თარგმანი დამოწმებული უნდა იყოს თარჯიმნის ან/და თარჯიმანთა ბიუროს ბეჭდით;

ზ) მიწვეული მკვლევრის აკადემიური ხარისხის დამადასტურებელი დოკუმენტი, თუ აკადემიური ხარისხის დამადასტურებელი დოკუმენტი უცხოეთშია გაცემული, მას თან უნდა დაერთოს უცხოეთში მიღებული განათლების აღიარების დოკუმენტი, გაცემული საქართველოს განათლების, მეცნიერების, კულტურისა და სპორტის სამინისტროს „სსიპ - განათლების ხარისხის განვითარების ეროვნული ცენტრის“ მიერ.

3. საგრანტო კონკურსში მონაწილეობისათვის ფონდის კანცელარიაში კონკურსანტებმა უნდა წარმოადგინონ:

ა) „განცხადება კონკურსში მონაწილეობის შესახებ“ (გენერირება GMUS-ით) დამოწმებული შესაბამისი ხელმოწერით (იგულისხმება მხოლოდ სველი ხელმოწერა).

4. კონკურსში გამარჯვების შემთხვევაში გრანტის მიმღებმა ფონდის კანცელარიაში უნდა წარმოადგინოს:

ა) მიზნობრივი ანგარიშის რეკვიზიტები – ამ პროექტისათვის გახსნილი ლარის საბანკო ანგარიშის ნომერი, რომელზეც გამარჯვების შემთხვევაში ჩაირიცხება გრანტი და ცნობა ბანკიდან, რომ აღნიშნულ ანგარიშზე არ დაირიცხება სარგებელი.

5. საკონკურსო დოკუმენტაცია წარმოდგენილი უნდა იყოს ამ ბრძანებით დამტკიცებული წესების, ფორმებისა და ვადების დაცვით.

6. პროექტის სრულყოფილად წარმოდგენაზე, ქართული და ინგლისური ვერსიების იდენტურობასა და თარგმანის ხარისხზე პასუხისმგებელია კონკურსანტი.

## მუხლი 5. კონკურსის ეტაპები

კონკურსის ეტაპებია:

ა) კონკურსის გამოცხადება;

ბ) საკონკურსო დოკუმენტაციის ფონდში წარდგენა;

გ) წარდგენილი საკონკურსო დოკუმენტაციის ტექნიკური ექსპერტიზა;

დ) პროექტების შეფასება ექსპერტთა პანელის მიერ;

ე) შეფასების საფუძველზე, გამარჯვებული პროექტების გამოვლენა და ფონდის გენერალური დირექტორის ინდივიდუალური ადმინისტრაციულ-სამართლებრივი აქტით დამტკიცება;

ვ) საგრანტო ხელშეკრულების გაფორმება.

## მუხლი 6. პროექტების შეფასება

1. კონკურსის მოთხოვნებთან შესაბამისობაში მყოფი პროექტები შეფასდება ფონდის გენერალური დირექტორის ინდივიდუალური ადმინისტრაციულ-სამართლებრივი აქტით დამტკიცებული ექსპერტთა პანელის მიერ.

2. ექსპერტთა პანელი პროექტებს აფასებს საქართველოს განათლების, მეცნიერებისა და ახალგაზრდობის მინისტრის 2025 წლის 15 მაისის N23/ნ ბრძანებით დამტკიცებული დებულების მე-14 მუხლით გათვალისწინებული პროექტის შეფასების კრიტერიუმების მიხედვით, ადგენს რანჟირებულ სიას, ავლენს გამარჯვებულ პროექტებს და დასამტკიცებლად წარუდგენს ფონდის გენერალურ დირექტორს.

3. ექსპერტთა პანელი უფლებამოსილია შეარჩიოს სათადარიგო პროექტები, რომლებიც ჩაენაცვლება გამარჯვებულ პროექტებს იმ შემთხვევაში, თუ გამარჯვებულებთან არ გაფორმდება საგრანტო ხელშეკრულება.